

# Ekereja Yoowokiwa

## N'ulumwenku



Yesu Kristu, Mwan'Awe, ni onnivaha itthu sothene mahala mwa Kristu. Hiyo ninnooxukhuruni Nyuwo, Pwiya, mwaha wa oreeriwa onivahiw'ahu ni Mukuttho ola muulupale woowunnuwa Yesu ovanhe awe mwaha wa hiyo oKalvario, wira onaataanihe nitthikelaka moopaththanani ni eparakha ni Nyuwo, wira hiyo niwerye okhalana ohakalala nno w'osuwela wira yolempwa wira, "Nyuwo mwakhala mwa Miyo, nave Masu Aka yakhala mwa nyuwo, nvekeleke etthu p'itthu entthunanyu, munimwiireliwa." Vano, hiyo ninnixukhuru mwaha wa yeela, ni ninvekela wira Nyuwo munivahe wamini wira naamini yeeyo ni sothene siri mwa hiyo.

<sup>2</sup> Vano munihye wira nihiye, Pwiya, muteko wothene wa nihiku, ovelavela wothene wa makhalelo ala, okhuma namurumeela mpakha pastore, wira ehikhale hat'etthu mmuupuweloni mwahu vano, masi wira nikhale niwehereryaka, niwiriyana voottittimiha wira Eroho Yowarya elavule ni hiyo, wira niwerye wira etthu yooreera, wira nisuwele sinci-ene sa Nyuwo, mwaha wo othukumana wahu. Maana, Pwiya, vekeekhai mwaha wa yeeyo hiyo erwenly'ahu nihiku nla nooviha. Mulavule ni hiyo mwa Masu Anyu makumi, ni muhiye Masu makumi ekhale mwa hiyo ni ohala mwa hiyo, wira hiyo niwerye wuupiwa n'upakiwa, kahi wa olumwenku, masi orukunxiwa mwa wuuluuliwa wa eroho ahu, mwa mukhalelo wa Mwana a Muluku. Oh, mirima sahu sinnithukumela okathi onuupuwel'ahu, ni otthapa onnipwiniha minepa sahu, osuwelaka wira ninniweya wiihaniwa aana axilopwana n'axithiyana a Muluku. Hiyo nnikhala vakhiviru vene wa Orwa Wawe wa nenli, ni ilapo sothene ni omwene sithukumelaka vathi va inawo sahu, itthu sothene sa molumwenkuni sinoolakaseya, masi nisuwelaka wira nihiku nlo Mwo onimoorwa ni onoonikuxa aniroihaka mOmweneeni memmo ohinrowa okhala-wo emalelo, wala, ohinrowa orukunxiwa. Ni wuupuwela wira hiyo vano n'a—n'atthu a Omwene yowo! O Muluku, muhule murima ahu ni maru ahu olelo, ni—ni Eroho Yowarya, mwa orapiha wa maasi a Masu. Vano hiyo ninvekela mwa Nsina Nawe ni wa ovuwa Wawe. Amen.

<sup>3</sup> Miyo kintthuna ophiyerya mwaha voosiis'ula. Maana, kaarowa olavula etthu yoovirikana vakhani vaari wira okhale muteko w'ovoniha, masi hiyo naahihimya wira ittikitti sa mavekelo saamurowa okaiwa ewora ya neethanu na tthaaru, mpakha thanu natthaaru ni minutu miloko miraru wala ewora

yaneethanu na xexe. Nto miyo paahi . . . Billy ophin'ye owani minutu vakhani sivinre nto owo khwira wira ntoko khaakhanle hata mutthu va, tivo owo khokanwe ittikitti sa mavekelo. Vano hiyo nno . . . Miyo kuupuwela okuxa yoosom'ela, wira ettharuxe ekereja. Nto kintthuna kilavule mwaha wa: *Ekereja Yoowokiwa N'ulumwenku*. Miyo kintthuna kisome vakhani vano ya Eliivuru ya Makhulupale, ekapitulu 16, opacerya eversikulu 10.

*Vano Dalila ahimuhimeerya Sansoni, Moone, nyuwo mookithey, ni mookoototha: vano mukileele, kinnoovekelani, munwerya sai otthukiwa.*

*Nto owo khimuhimeerya wira, nyuwo mwakitthukaru sana ni mikhoyi mikithi nlelo sshivareliwe muteko, nto kinimoolowa, kinalikana ni mulopwana mukina.*

*Dalila aahikuxa mikhoyi sa naanaano khimutthuka ni seiyo, vano khimuhimeerya, aFilisti animoorweelani, Sansoni. Ni yaahikhala alopwana akilaathaleene mpaani. Vano owo aahikwasa mmiyoononi mwawe ntoko nliinya.*

*Vano Dalila ahimuhimeerya Sansoni, Mpakha va nyuwo mookithey, ni mookoototha: mukileele vatthu vaniweyanyu otthukiwa. Nto owo ahimuhimeerya wira, Mvathhava ikharari . . . mikopwe mithanu na miili sa mmuruni mwaka, ni maliinya antthaveliwa ikuwo.*

*Vano owo aahitthukelela n'ikhomo, numala khimuhimeerya wira, aFilisti animoorweelani, Sansoni. Owo aahihihimuwa vaarup'awe, khuphela ikhomo, vamosa ni maliinya antthaveliwa ikuwo.*

*Owo khimuhimeerya wira, Munihimya sai wira, kinnootthunani, murim'anyu ohisiveliwaka ni miyo? mookithey imara tthaar, ni khamu . . . khamukileenle vatthu onkumanya ikuru sanyu suulupale; nlelo khamukileenle vatthu onkumanya ikuru sanyu suulupale.*

*Vano vaahiiraneya wira, aanimunyoonyiha nihiku ti nihiku ni moolumo awe, amuukhulaka, mpakha munepa awe ophweeleya anahalela okhwa;*

*Vano owo aahimuleela murima awe wothene, khimuhimeerya wira, Muru aka ene yoola nkinametthiwe; maana ki muNasiri a Muluku okhuma mmirimani mwameyaka: kametthiwa vale, nto ikuru saka sinookitthyawa, ni kinookhala oowoolowa, kinalikana n'alopwana akina.*

*Vano Dalila voonal'yawe wira owo ahimuhimeerya murim'awe wothene, owo aahaaruma ni khuwiihana . . . makhulupale a aFilisti, iraka, Murwaaseke okathi ula, maana owo ookooniherya murim'awe wothene. Nto*

*makhulupale a aFilisti yaahirwa wa yowo, khurwela musurukhu mma, kiireke khimuruuhela musurukhu mmatatani mwawe.*

*Vano owo aahimurupaathiha vamettoni vawe; khumwiihana mulopwana mmosa, vano owo khumettha mikopwe mithanu na miili sa mmuruni mwawe; ni...khupacerya omuukhula, vano ikuru sawe saahimutthyawa.*

*Vano owo khwira, aFilisti animoorweelani, Sansoni. Nto owo aahihimuwa vaarup'awe, khwira, kinoorowa ekwah'ela ntoko imara sikina ottuli, kinimwiisaakiha. Nto khaasuwela wira APWIYA yaahimuhya.*

<sup>4</sup> Vano kintthuna kisome, yoosoma ya mwah'ola, eniphwanyaneya muLiivuruni mwa Wisuupulula, ekapitulu 2, opacerya eversikulu 21 ni 23.

*Vano miyo konvaha okathi wira attharuwe onamuttompe awe; nto owo khottharunwe.*

*Mwiiwe, miyo kinoomurihela voolilini, n'ale anraruwan'awe moohaawani wuulupale, yaahittharuwe-ru meettelo aya.*

*Ni kinoowiiva an'awe; ni ikereja sothene sinoosuwela wira miyo t'ule ontokosa miyuupuwelo ni mirima s'atthu: ni kinoomuvaha khula mutthu a nyuwo kittharihelaka miteko s'awe.*

Apwiya yincererye iparakha Saya osommwa wa Masu Aya.

<sup>5</sup> Sansoni, oolikanexa n'ikereja, aapacenrye oratta-ene. Owo aapacenrye mpante woolikana. Owo aaropacerya, ni khwiihaniwa mulopwana a ikuru a feita. Owo aapacenrye, aarumeelaka Apwiya, mwa osuka Masu Aya ni ovara Sooruma Saya. Nto eyo yaari etthu ntoko ekereja. Eyo epacenrye ni, ntoko saarow'ahu ohimya, ntoko sinihimmw'aya mulaponi, epacenrye ni mwetto woolopwana. Epacenrye osuka Sooruma s'Apwiya. Nto okathi Sansoni vaakhal'awe aattharaka Apwiya, Apwiya yaaninvarela muteko Sansoni.

<sup>6</sup> Maana, Muluku onniwerya omusuka mutthu ti mutthu ni omurumeela mutthu ti mutthu onimutthara Yowo, maana owo ti muteko wa Muluku. Masi hiyo narukunuwelaru epante ekina, nihiyaka itthu sa Muluku, vano Muluku khannivarela-tho muteko. Hiyo neettakaru voviilipiha nittharaka Sooruma sa Muluku, naakhalaka-ru mmakukhuni a Bibilia ni okokhorela mwa Masu oolempwa, omukokhorela Yowo mw'Eroho ni mw'Ekeekhai ya Masu, nto Muluku onniwerya onvarela muteko mutthu ti mutthu. Masi atthu yaakuxaka muupuwelo wira erukunuwele etthu ekina, vano Muluku khaninvarela tho muteko mutthu uwo.

<sup>7</sup> Vano, Sansoni onipaka mo—mooniheryo woolikana wa ekereja olelo. Okathi ekereja epaceny'aya, Muluku aaniwerya ovarela muteko ekereja, maana ekereja yaaneetta voolikaneene ettharaka Sooruma s'Apwiya, yaanisuka ikano Saya sothene ni sooruma Saya, ni yaanivara Sooruma Saya sothene. Vano Muluku aari ni ekereja. Masi enikhala ntoko nookhala nipuro nimosa nootteetheya eriyari y'ekereja.

<sup>8</sup> Muupuwele, hiyo khanri vaniirani, masi nri vapuwani v'ekhotto. Aththu anci-ene anuupuwela paahi wira awo yakhalaru muKristu wira yothene entthuneya wira ti yeeyo, wira eyo ennimaliha mwaha khuluwiru, yakhalaru muKristu nto itthu sothene sinoorowa orwa vookhweya. Muhikhaleneke eyo mmuruni mwanyu. Maana, miyo kinikhala muKristu wira kiwaneke ekhotto, owana ekhotto yooreera ya wamini. Miyo kinikhala muKristu, wira kivolowe mphironi mw'ekhotto. Hiyo n'anakhotto aKristu, nto nihaana wiixuttihiwa n'ulakiwa, n'usuwela oratta wa nwanani, wira nisuwele moota wo wiikhomaaliha, wira nisuwele moota wo—wo owana ekhotto. Nto hiyo nnoowerya wira yeeyo ntoko Eroho Yowarya enrow'aya onuupululela. Khivanweryaneya hiyo okuxa ethhu elapo ekina ennihimeery'aya okathi onrow'ahu okhottoni, ankhili aya amosa amosa. Masi hiyo nihaana okuxa ankhili ahu yoohi, enamuna Eroho Yowarya yaarow'aya oneettiha, ni ankhili xeni Eyo yaarow'aya onivaha, okhala wira Eyo t'iri Mukhulupale Oomalela wa muloko w'anakhotto a aKristu.

<sup>9</sup> Sansoni aahikelela ohoolo, owo aari mutthu muulupale mpakha vapaceny'awe o, vapaceny'awe p'uhimya wene (hiyo naarowa wiihana) opaka olavilavi mmawaani, mpakha owo opacerya okhuma nipuro nawe nene. Nave ekereja yaaneetta sana, ni sothene saari sana mpakha aththu opacerya okhuma nipuro naya. Sansoni aaroopacerya opatthana. Ni owo khaapatthana n'aximwali a Isarayeli, owo aapaceny'aye opatthana n'aximwali a aFilisti.

<sup>10</sup> Nto eyo ti yoolikanexa n'ile ekereja yiiraly'aya. Eyo khenapaceryeke ophentana n'aththu aya, eyo erookhuma yaattharaka aththu oohaamini khupacerya opatthana n'aththu oohaamini. Ti vaavo hiyo niiraly'ahu ovonya wahu, wuulupale ni emosa wa soovonya sahu suulupalexa, p'ukathi ekereja epaceny'aya wira itthu sahaari sooreera. Eyo khupacerya okhalana, ntoko Sansoni, opatthani wootakhala.

<sup>11</sup> Sansoni, okathi aakhalan'awe opatthani w'aththu a Apwiya, owo aaheetta sana. Masi vapaceny'awe opatthana n'upatthani wootakhala, vano owo aahiphwanya mulattu.

<sup>12</sup> Nto eyo p'inamuna siry'aya ni ekereja. Okathi ekereja yaatthar'aya voottittimiha ni khula nihiku ohoolela wa Eroho Yowarya, Muluku aanaareeriha, ni miiriirya n'ithoonyeryo ni mitikiniho saanitthara ekereja. Masi vapaceny'aya okhalana

opatthani wootakhala, n'ulumwenku! Emosa wa itthu sootepaxa yiiraly'aya, nto etthu yoopacerya yiiraly'aya, eyo eroopacerya wiitthokiha, ehononaka opatthani eriyari y'atthu akina oowaamini, okhala wira awo yaarimoona wira mittetthe saari sootthokihiwa. Masi Ehapari yooreera ela yuulupale khenivaheriwa elapo emosa wala nloko nimosa. Eyo enivaheriwa "ole ontthuna, arwe," ilapo sothene, mahimo, mattaava, n'atthu. Muluku khanatthuneke wira hiyo nikwerethe mikaano soovalaanya.

<sup>13</sup> Masi atthu khitthuna okhala ntoko, awo anoolikaniha, wala otakiha, anrowa ntoko o—olumwenku siniir'aya, annihimya itthu awo sinihim'aya, okela ohoolo ntoko awo saakel'aya ohoolo. Khivanweryaneya nnakhala hiyo okela ohoolo niiraka itthu olumwenku siniir'aya. Hiyo nnoowerya paahi okela ohoolo naattharaka-ru sooruma sa Muluku ni enamuna Awe yo wira itthu. Khivanweryaneya nnakhala hiyo okhala, nikuxaka olumwenku ntoko ettharihelo. Vakhala wira ikaafirika ya sikaro sinnipwanya muruweryo aya muulupale ni televisau, ni atthu anaapaka asaravexa ni whiskhi anniphwanya muruweryo aya muulupale mwaha wa mukhaliheryo wa televisau, eyo kehiyo ethooneryo wira ekereja enookela ohoolo mwaha wa televisau. Okela ohoolo w'ekereja onikhala muhina wo olaleya Ehapari yooreera, ya Owerya wa Muluku, ni wooniherya wa Eroho. Hiyo nihiireke wira okhala wira televisau ehiirela etthu *khata-khata* ekaafirika ya sikaro ni i—ikaafirika sikina! Hiyo khanrina hata Yoolempwa emosa wira neereryeke wiilikanyiha n'atthu awo. Nto hiyo niiraka-ru, hiyo pooti waavara murima atthu oowaatta, masi eyo kehiyo etthu Muluku onirumme awe hiyo wira. Hiyo nnuupuwela wira okhala wira hiyo othene noowooneya, nitthunaka itthu suulupale, mitthenkeso suulupale, niirihaka itthu soowooneya okhumelela, wira owo mureerelo. Hiyo nnimookhwa khula nihiku munawoni mwahu, olavula wa eroho! Vaakhanle wira hiyo naamunya ni ikuru s'atthu imilyau muloko voosiis'ula, ni Eroho Yowarya ehikhanle ni hiyo, naamurowa ohoolo ovenya ni ikuru s'atthu muloko ni Eroho Yowarya ni hiyo. Nihilikanyiheke n'ulumwenku.

<sup>14</sup> Vano emosa wa itthu soopacerya, yaari wira, ekereja yaaroopacerya wiitthokiha mmansaya. Mutthenkeso woopacerya yaari ekereja Katolika, vano nto khurwa ekereja Luterana. Vaitthokihaly'aya mukereja Katolika wira epake mutthenkeso, nihiku nimosa waahikhala mukhuwelelo, "aFilisti ari mwa nyuwo, Sansoni," nto Sansoni khittumula mikhoyi s'otthuka wa ekereja Katolika, nto Martinho Lutero khikhuma, ni mitthenkeso.

<sup>15</sup> Vano awo khitthuka ekereja ni mukhoyi mukina, ntoko siiralyaawe Dalila. Nto awo khupacerya...ohiya okhalana mutthu oowiihaniwa ni Muluku, atthu oowiihaniwa ni Eroho Yowarya; alakela yahaamusuwela ABC aya, masi

yaanimusuwela Kristu. Vano ekereja khukhala yoophwaneliwa, khupakiwa etthariheliwaka anamalavula a ipolitika. Vano awo yaahaana waavaha alaleyi aya “ikharau s’etotori,” khula mutthu aahaana okhala Totori a Divindad. Owo waari mukhoyi mukina waatthunke ekereja. Atthu anookhuma n’usoma, khula eseminario entthuna omukumiherya musomi oosuwelexa wira ikereja saya siweryeke wiihimya, “Pastore ahu Totori a Divindad.” Nto awo aniira exeni? Mmosa oneererya okhalana osuwela woowaatta onvikana mukina. Vano, eyo khenihimya hat’etthu vamaithoni va Muluku.

16 Ni khivantthuneya hata vakhani wira mutthu eereryeke okuxa osuwela wawe wa molumwenkuni khukhalakhala amusivelihaka Muluku ni yeeyo. Eyo etthu yoowiitta vamaithoni va Muluku! Khamunkhalakhala mmusivelihaka Muluku ni ophavela wanyu sa molumenkuni ni osuwela, okhala wira “owo owanani ni Muluku,” sinihimya Soolempwaa. Khivanweryaneya Owo wira eyo.

17 Nto khula mmosa onthhuna okhalana osuwela wothene. Awo annisuwela vekehai etthu yo wira ni moolumo oohimya, nto eyo enikhala elavulelo ya politika paahi ohiya Mutthaka wo wooniherya owerya, wa Eroho Yowarya onikela vathi mmurimani mw’atthu n’ukumiherya itampi saya. Awo aniixuttihiwa malavulelo a ipolitika, nave hiyo khanimphavela eyo. Paulo ohimye wira, “Masu arwiye wa hiyo, kahi paahi. . . wala, Ehapari yooreera, mwa Masu paahi, masi ni Owerya ni wooniherya wa Eroho Yowarya.” Eyo yooruha Ehapari yooreera, yooniheryaka ikuru sa Eroho Yowarya! Masi atthu ala othene anookhuma arowaka oseminario ni wiixutta osoma wuulupale, moota entthuney’aya weemela ohoolo w’atthu, moota entthuney’aya awo wiisooniherya, moota entthuney’aya awo owara ni moota entthuneya awo wira, khivantthuneya awo omurumeela kramatika oovonyeya. Vano, iyo ti sooreera wa malavulelo a politika, masi hiyo khaninthara osiveliha wa moolumo a mutthu. Paulo ohimye wira, “Ehapari yooreera enlaleery’aka kherwiye siiso, masi Eyo erwiye mwa wuuluula wa e—Eroho Yowarya ni Owerya wo wooniherya.” Khenirwa ni malavulelo oopakiwa oratta-ene, wira osuwela wanyu okhale, ahiso oromela wanyu okhale mwa osuwela wa mutthu. Masi eyo enrwa mwa wooniherya wa Owerya wa Kristu oohihimuwa. Eyo ti Ehapari yooreera, “Omusuwela Yowo mwa Owerya wo ohihimuwa Wawe.”

18 Khula mmosa oneererya wuupuwela wira owo t’ori oosuwelaxa omuvikana mutthu mukina, khula muromolelo. aMetotista animwiira, “Hiyo nrina mutthu oosuwelexa.” aPatista animwiira, ni ekereja ya Kristu, ni siiso, othene aya, “Hiyo, hiyo ti nikhanle oosuwelexa. Hiyo, awihu—atthu ahu, hiyo khanimuhiya mutthu pure paahi orowa olaleya Ehapari yooreera.” Masi awo animwaathanla sana. (O Muluku,

animorele ikharari!) Animwaathanla sana; awo yaakhanleene owiixuttihiwa ni mwiixuttiho aya, vano awo animwaahela mukereja. Muluku khanimukwannya hata vakhani. Miyo kimmutthuna mutthu akilaleerye othanliwe ni Eroho Yowarya, Muluku omuvenxaly'awe, kahi oothanliwa ni mutthu wala miromolelo.

<sup>19</sup> Osuwela wothene! Awo aniira, "Oh, hiyo ninnisuwela sothene sa Yeeyo," nave akina wa awo khansuwela mwiixutto woopacerya wa Eroho Yowarya. Awo anookhotta Eyo.

<sup>20</sup> Eyo enikuupuxerya eliivuru yaamukhaani kaasomme aka nihiku nlo oCalifornia, mwa iyakha muloko sivinre. Miyo kaakunxe empa ya khalai ya iliivuru. Kooliyala t'ani aari mulipa-oolepa. Eliivuru yaamukhaani paahi ya isentavo muloko, masi yaahikhalana maana ooreera mwa yeela enamwi yaakhala ntoko voothweela ni voowoka. Masi, kaahiphwanya-mo etthu yiiweya ntoko Muluku, wa miyo. Nto emosa wa ihantisi saamukhaani yaapacerya so. Voosiisu umosa mw'ehilini yuulupale y'alyakhu, aahikhala muthupi mmosa mwaamukhaani uupuwela wira aahikhalana miruku sothene saakhanle wira sisuweliwe. Vano owo khuvavela vakaaxani khumanela eyano awe yaamukhaani vakaaxani, imara xexe wala thanu, khurukunxela muru awe ottuli mwaamukhaani khwiipa ntoko sihinamwiiwe anyu muthupi wiipa. Nto akina aya, owo khwaavara murima, nto owo khwira, "Axithiyana ni axilopwana a mw'ehilini mu, kaatthuna kilavule ni nyuwo othene voosiis'ula mwaha wa mutthokiheryo muulupale w'osoma hiyo nimanly'ahu okhalaha." Khwira, "Miyo kinnivekela osuwela wunci-ene mwa masomelo aka," okathi opurunly'awe ilumeta sawe mpakha vayanoni wawe. Nto owo khwira, "Miyo koolakela wira hiyo alyakhu nnoowerya wiisinnuwiha mmansihu ni ankhili oowaatta. Tivo, miyo kinoowerya wohimeeryani wira vatthu, hiyo nathiparu n'uvara muteko mw'ehilini wala mwithe, nnoophwanya evitamina emosa enrowa oniipiha sana, mapururu ooreerexa. Ni, oh, miyo kinimooleelani moota onwery'ahu wiisinnuwiha mmansihu mwa inamuna sinci-ene sohiya-hiyana."

<sup>21</sup> Nto alyakhu axikhaani ni iconcoro saya sikhaani, awo yaamurettehasa paahi ni wira, "Owo kahiyo oophenteya?" Ni awo vekeekhai yaanimuxankela. "Oh, ole muthupii oottittimiheya!" Enikuupuxerya amosa amosa w'alaleyi ala a oseminario. "Mutthu oottittimiheya! Khivantthuneya hiyo okhala pure-pure n'alyakhu akina, hiyo othene naahaana orowa ni yole."

<sup>22</sup> Vano, muthupi mwaamukhaani ohinatthi omaliha malavulelo awe, aahikhala mwalyakhu mukina mwaamukhaani ahaarina mapururu oocerimelaxa, aarwiiye atthyawaka akhumaka vapuwani w'alyakhu akina, khwira, "Amiravo, minutu mmosa paahi! Miyo kinoomalaru wiiwa epaphelo

yookiserya muraatiyuni. Alyakhu aawela esisapo isentavo xexe, khula elivra [450 g] hiyo othene ninrowa nipuro oniivaniwa inama meelo! Osuwela wanyu onrowa woovahani mureerelo xeni?"

<sup>23</sup> Munna, osuwela wothene hiyo onwery'ahu othukumanya, mureerelo xeni onrow'aya wira? Hiyo nri inawo thanu na mosa [1,82 m] sa vathi! Hiyo othene nnimookhwa mwa ipolekaata ni mwa minu. Osuwela wahu khonihimya hat'etthu. Hiyo ninthuna omusuwela Yowo. Masi awo anniira yeeyo.

<sup>24</sup> Ntoko saahimy'aka okathi uwo ovinre mwaha wa xirikhu mmosa mwaamukhaani, nto owo uupuwela wira aanisuwela ankhili othene ya—yaatthuneya osuweliwa, ni aanisuwela vanci-ene vaawery'awe waaleela axirikhu akina mwaha w'atthu. Vano owo khuvava mpakha vakayelani vawe khupacerya olavula mwaha w'atthu, moota owo aasuwel'awe sothene sa awo. Nto, naanaanoru, musomiha mmosa a oPurdue khurwa khupacerya omulavulela moolumo mamosa ooratteliwa sana yowo, nto mwapalame mwaamukhaani ula khwaaphila maitho awe khurukunxa muru awe ni . . . Vano, owo aahikhalana maitho, aaniwerya omoona musomiha. Owo aahikhalana maru, owo aaniwerya omwiiwa. Masi, vekeekhai, owo khaasuwela etthu aahimy'awe. Mwaha wa xeni? Owo orina ottoopore wa xirikhu. Owo otopore wa mwaapalame paahi. Ti yeeyo tu owo orin'awe. Owo khorina otopore wa mutthu, tivo owo khonwerya wuupuwela ntoko atthu.

<sup>25</sup> Hata mutthu khanwerya wuupuwela ntoko Muluku! Nyuwo mwa mutthu, ni osuwela wothene wa molumwenkuni khonvikana ottoopore wa xirikhu. Sothene siniir'anyu, nyuwo munimwiisikuliha mmansinyu ni yeeyo. Nyuwo muhaana okhalana muupuwelo wa Kristu.

<sup>26</sup> Etthu atthu anrowel'aya ni wiitakaniha ni mitthenkeso, ni waakakhanya ovahana mukhono ohiya oyariwa vasya, awo aneererya oxerekela oyariwa vasya. Awo khandthuna oyariwa vasya. Ni awo—awo annisuwela wira hiyo niniixuttiha yowo mBibiliani, tivo awo antthun'aya waakakhanya ela n'itthu. Ni atthu aPentekosite t'otakhala siiso, yeereryaka waakakhanya etthu! Awo antthuna eyo mwa enamuna y'oratta. Ehaana okhala y'oratta sana, "Nnoovahana mukhono ni wiitakaniha mukereja, n'umiseriwa wala opatisiwa," wala etthu siiso. Awo animoova oyariwa vasya. Miyo imara sikina kinnikupali wira eTapernakulu Branham enikhala yowoova yoowo!

<sup>27</sup> Vano, hiyo othene noosuwela wira oyariwa, khenikicala nipuro xeni onikhal'aya, wala nipuro xeni, wala waattamela vai, ti woottakatta. Vaari wira mwana oniyariwa vanikutthani va makatapha, wala vathi voolipa, wala musaala y'oxipiritali yoopintariwa yooxeerya, ti woottakatta, khula enamuna.



Oyariwa wa mwanyompe, oyariwa w'etthu p'itthu ekina, ti woottakatta.

<sup>28</sup> Nto oyariwa vasya kahi hat'etthu woohikhala ottakatta! Masi atthu t'olipa, "Hiyo nnoorowa weiwo atthu anvahan'aya mukhono. Hiyo nnoorowa weiwo atthu ahinkhuwel'aya ni wunla, n'umana waltari ni oxonttela." Nyuwo muntthuna okhalaxa mutthu! Etthu ennitthuna hiyo oyariwaa, okhwa voomalela, oniruuha Ekumi!

<sup>29</sup> Epyo, kharaka a khalai, epyo ya kharaka, nyuwo mmukuxe kharak'ole mmuhele vathi. Mpakha okhalana akharaka asya, kharaka ole a khalai ohaana wuntta. Nakhuwo khonwerya okumiherya ekumi esya mpakha ontte.

<sup>30</sup> Nave mulopwana wala muthiyana khanwerya okhalana oyariwa vasya mpakha ankhili aya ni wiisuupuwela waya wuntte, woohwa, okhwa voomalela waltari, ni yinlaka, okhala othene oottakatta, mpakha olipa iwe okhuma vamukalani vanyu, nto nyuwo munooyariwa vasya ni Eroho ya Muluku. Miyo khenikicala sinto nyuwo munookhuwela, olavula ilavulelo, otupha osulu ni vathi, wiimana ntoko mwalyakhu oohikhalana muru, nyuwo muniruuha Ekumi esya! Masi hiyo naakakanye n'itthu ekina, hiyo ninthuna enamuna yoolimaleleya, vekeekhai.

<sup>31</sup> Nihiku nlo, Namathanu, amwaar'aka ni miyo naarowa mw'armasia. Miyo nkinlakela otthikela ela. Masi okathi waarow'ahu mphironi, miyo kaakhala kirukunxaka muru aka paahi nno ni nno, athiyana oohiwar'etthu. Miyo kaahimuleela Muluku okathi waary'aka mutthu oohoona, wira Owo aavoninheru maitho aka kaatthuna owehaka etthu yooloka. Ni miyo kookhalana mwiikimanyo mwaamukhaani kithomeiye aka mukaaroni mwaka. Okathi onoon'aka etthu ntoko eyo, kiniweha vamwiikimanyo ni wira, "O Muluku, Ole ti Ntthyawelo naka," okathi waaweh'aka vamwiikimanyo.

<sup>32</sup> Miyo kaaniwoona axithiyana ale. Meda khwira, "Khanimoonne muthiyana mmosa olelo owanre esaaya." Nto awo khwira, "Bill, nkanweheni muthiyan'ole vale ni ikhulula iye saamukhaani siri vasulu v'erutthu awe," nto khwira, "nyuwo munikileela wira muthiyan'ole khonsuwela wira ele ti yoonanara?" Khwira, "Vakhala wira khonsuwela wira ti yoonanara, weso ole oovahuwa."

<sup>33</sup> Miyo khwira, "Minutu mmosa paahi, mwaar'aka. Ole mutthu a wAmerika, oniira ntoko atthu a wAmerika siniir'aya." Miyo khwira, "Miyo kaari oFilantiya kahi khalai, mwaar'aka."

<sup>34</sup> Nto miyo kaahitikinihiwa iwe mwaha wa mulopwana mmosa aakikilaathinhe, Totori Manninen. Nto hiyo naarowa wo—woorapani w'ekumi, yowo oniihaniwa "sauna," nto awo animookuxani ni woohelani maasi ooviha, wala maasi vamaalukuni vooviha, nto eyo enimooviherihani paahi. Vano

awo animootupihani mmaasini a xeelo, n'ukhuma tho. Nto animoovoloihani mpaani, nto aakhala manfurumeero axithiyana mmo, axithiyana anaattikittha alopwana (awo ahiwanre etthu), ni waattikiherya mutankini mwa maasi. Miyo nkaakenle. Nto miyo khwira, "Totori Manninen, eyo ti yoonanara."

<sup>35</sup> Owo khwira, "Vaareera nto, Reverendu Branham, eyo ti yoonanara. Vano ankhi matothoro anyu a wAmerika animurularula muthiyana khumpweha vameesa, n'umutholathola khula etthu—etthu erin'awe v'omwilimwana? Ankhi manfurumeera anyu muxipiritali?"

<sup>36</sup> Miyo khwira, "Mukilevelele, Munna Manninen, Manninen, mookhalana exariya."

<sup>37</sup> Exeni iyo? Iyo ilimaleloo. Okathi waary'aka oParis waahikirikela wamini iyo, wira mapuro oorusa yaari mamosaru w'alopwana n'athiyana. Nkaawerya otthokelela, exooro yaari epantte y'ephiro w'alopwana n'athiyana. Nkaawerya okupali wira muthiyana aarowaka ophareya orowa orapelela, mmiravo ni mposi awe, awo kharina nipuro n'orula-vo ikuwo, awo yaamurula ikuwo saya paahi mpakha ele yookiserya, nto n'urukunuwa n'uwara ekhulula yaamukhaani n'urowa orapelela, masi ti siiso. Awo khayaaloha eyo hata vakhani. Eyo elimaleloo y'oFransa.

<sup>38</sup> wAfrika, athiyana n'alopwana, amiravo n'atokweene, hata ekuwo nnakhala, yeettasaka mminyepuni. Khanasuweleke exooro, wala itthu siiso, wala mmosa khanakhumeke ohoolo wa mukhw'awe. Masi awo khansuwela evirikanelo aya. Awo khansuwela evirikanelo aya. Masi iyo ilimaleloo sa ilapo.

<sup>39</sup> Masi miyo khwira, "Mwaar'aka, hiyo n'atthu oovirikana, hiyo n'atthu a Elapo ekina. Hiyo n'anawetta ni amalapo mu, ti yeeyo enikhaliha itthu iya wooneya ntoko soonanarexa. Maana Bibilia ohimnye wira, 'Ale anthara itthu iyo, anihimya, annooniherya wira anawetta ni amalapo, awo amphavela muttethe onoorwa."

<sup>40</sup> Mulopwana wala muthiyana w'Italia, oFransa, wAfrika, khula elapo ekina, oyariwe vasya a Eroho Yowarya, khaniira itthu iyo. Awo khanwara ikuwo iyo. Awo khanrowa weetta siiso, okhala wira t'Elapo ekina Weiwo Mwene ni Namateka okhanle Muluku. Hiyo n'atthu a Wirimu. Eroho eri mwa nyuwo, ennilihiha makhalelo anyu. Nyuwo mwaari mutthu a wAmerika, munimwiira ntoko atthu a wAmerika siniir'aya. Nyuwo mwaari muFransa, munimwiira ntoko aFransa siniir'aya, ni omuulumela mukina. Masi mwaari a Muluku, munimwiira ntoko siniiriw'aya Wirimu, okhala wira Eroho anyu enikhuma Osulu ni Eyo enniweettihani.

<sup>41</sup> Etthu yaamukhaani eniwery'anyu oweha. Mwa Soolempwa, ale yaaphavela Muttethe ola musya, yeetta voovirikana. Awo yaanihimya wira yaari anawetta n'amalapo. Masi epantte

ya Kayini, awo yaari anamatthyawa ni ookhootta. Masi aKristu yaari anawetta n'amalapo. Namatthyawa kharina owani, namakhootta mutthu ootakhala. Masi nawetta etthu y'ekeekhai, ni a muttethe w'ekeekhai Elapo ekina, aavyaka ophwanya ephiro y'Owani, ahimyaka ni makhalelo awe wira owo ookhalana etthu wira owo t'Elapo ekina. Vo ti vari niwoko naya.

<sup>42</sup> Masi nlelo atthu ale aniira siiso, atthu ale aniwara itthu iyo, mukihye kooleleni. wAfrika do Sul, okathi waawonne aka atthu a mutakhwani ikonto miloko miraru, oohiwar'etthu, a elapo yeeyo. Aximwali a iyakha muloko ni thanu na mosa, thanu na tthaaru, miloko miili, amiravo ahirina hata ntapwatta n'ekuwo, yeemenleene vale ni mattophe owiitho waya, ni owiipintari, makhuva aviraka iphula saya, ni mapattuuxa a miri athomeiyeene mmaaruni mwaya, ni makhuva a mutthu atyunleene wala makhuva mukhararini mwaya, maino a axinama aryeene mwa yawo, oohiwar'etthu ntoko siruly'aya molumwenkuni, nave ehisuwelaka eyo. Masi vamwaakhenly'aya Kristu, khumora yiipopheyaka khwaakhela Eroho Yowarya, awo yaahivenyasa khikhuna miyoono saya wira ekhunele ehaaya ya mapele aya, okathi waakhum'aya n'uphwanya ikuwo n'uwara. Mwaha wa xeni? Awo jaarookhala anawetta n'amalapo a molumwenkuni mu. Aleluya! Awo yaari ottaiwene wa Yowo. Ayo, mulopwana.

<sup>43</sup> Oh, ayo, atthu ala aniisihana aKristu. Awo aniira mpantta wa ikereja. Awo anoookhuma ni wira, "Hiyo n'aMetotista. Hiyo n'aPatista. Hiyo n'aPentekosite. Hiyo n'Ativentista a Nihiku na neethanu nenli. Hiyo na *ela, ele*, ni *ekina*." Eyo kherina nata n'yo. Eroho anyu, makhalelo ari mwa nyuwo, annilipiha ni annihimya ele nyuwo mukhanly'anyu. Yesu ohimmye wira, "Ni mihokorokho saya munimwaasuwela."

<sup>44</sup> Ekereja eri ntoko Isarayeli, wopaceryani. Awo jaarimoona mittethe sothene s'apakau okhalana mwene. Muluku t'ari Mwene aya. Ni awo jaarimoona ilapo s'epakau sikhalanaka mwene, vano awo khithhuna wira ntoko ilapo s'epakau, nave awo khwiithumela mwene. Nto vairaly'aya siiso, awo khuphwanya mulattu. Vakhani-vakhani khupacerya okela-mo. Vakhani-vakhani olumwenku khupacerya waakela voowiipitha. Vookiserya khumalela ni Akhabi. Mwene mmosa arwaaka vakhani paahi vakhiviru va yeeyo, vakhiviru vakhani va yeeyo, ni vookiserya khuwamela ota ekumi yaari mwa yawo. Vano awo khurova vale. Nto okathi orwiiy'awe Mwene eekeekhai, awo khayamusuwenle Owo.

<sup>45</sup> Eyo etthu emosaru ekereja yiiraly'aya. Eyo eroopaka. Nyuwo muri va. Eyo eroopaka ipolitika, isomelo. Eyo eroopaka mitthenkeso, muloko, ikereja suulupale, alaleyi owiikuxererya. Nto okathi Mwene eekeekhai onirw'awe, awo khammusuwela Owo, ni awo anoookhomela vamwiikimanyo Eroho Yowarya yeeyo ekhanle Mwene aya. Awo khammusuwela

Owo, masi awo anoomutheya Owo n'umunyemula. Ntoko aYuta saamwiirinh'aya Mesiya aya, ekereja enimwiiriha siiso Mesiya aya. Awo khansuwela eyo. Awo kharina otthokelela wa eroho, okhala wira awo t'owixuttexa ni maitho aya ni ele enoon'aya, ipa suulupale, athhunaka wiilikanyiha n'ulumwenku. Hiyo khinnatumereryeke—khinnatumererye wiilikanyiha n'ulumwenku. Hiyo nintumereriwa wiiyeviha mmansihu.

<sup>46</sup> Vano, mmosa ti eyuulupale, mwa Muluku. Ni olelo anamalaleya a ovonihā mmittettheni, wookhala oxinttana, anamaxinttana. Mmosa oniira, "Ahe, attottopeliwe Muluku, anamookhalana ikonto sene. Miyo kirina muthukumano muulupale ovikana murin'anyu." Evirikanelo xeni iyo eniir'aya? Naakhalanne—ene mmosa wala emilyau emosa, evirikanelo xeni eniir'aya? Hiyo n'atthu oororomeleya wa Muluku? Hiyo n'atthu oororomeleya ni Masu Awe? Ninnikhala oolipa ni wootola wa Eroho Yowarya? Eyo ekeekhai? Eyo t'itthu yuulupale.

<sup>47</sup> Masi hiyo nnimwiisakaleliha vasulu va Bibilia. Anci-ene wa atthu ahu aPentekosite, vasulu va Miixuttiho sootthuneya sa Bibilia ola, animwiisakaleliha. Yookhala. . . Miyo nkinthuna wiiniha murima. Kiri mukereja mwaka, ni kinoona wira miyo—miyo kaamuwerya wira ele paahi, mukereja mwaka, okhala wira kinlaleya Ehapari yooreera. Masi aakhala alaleyi ikonto miloko sene aPentekosite ansuwela wira khekhanle etthu iyo mBibiliani ntoko opatiiso ni nsina "n'Atithi, Mwana, Eroho Yowarya." Miyo kinnimutharamula pixipu muulupale, wala mutthu ti mutthu, wira akoonihe nipuro mutthu ti mutthu otonko awe opatisiwa ni nsina "n'Atithi, Mwana, Eroho Yowarya." Masi awo animwiisakaleliha, okhala wira mitthenekeso siniira siiso. Khokhanle hata mutthu mmosa mwa Waataana wa Naanaano, ni mwa iyakha imiya tthaaru ohoolo waya, mwa wahala, woohikhala oopatisiwa ni Nsina na Yesu Kristu. Exeni iyo? Mutthenkeso. Ti wiirale eyo. Wiisakalelihaka!

<sup>48</sup> Nto olelo ahaakumiha anamuteko othene mphironi. Awo aamukumihā sakala mukereja. Awo aakumiherya ota ovuwa wothene wa ekereja, khukhalana olaleya w'oseminario, olaleya iwe waamukhaani wa econcoro ya muthupi, wothene wooratteliwa mmulokoni, ni axithiyana aya yaawaraka akaputtula ni ivistiitu sintita erutthu, ni alopwana yaapahaka asikaro, ni amweettaka cuuku alavulaka iperwa soonanara. Iwo otakhaliwa vamaithoni va Muluku! Miyo koosuwela wira eyo ti yoolipa, masi ola okathi wa mutthu ohimya etthu. Wiisakaleliha, akupaliki, yiiraka ntoko olumwenku!

<sup>49</sup> Miyo khenikicala vakhala wira kihaana okhala meek'h'aka, ohikhala ni hata mutthu masi ni Muluku paahi, miyo kinoolaleya Ekeekhai ya Bibilia a Muluku ni okhapelela Yeeyo. Kakhwa, nlelo kinookhapelela Ekeekhai. Vekeekhayi. Hiyo ninthuna Ekeekhaii. Miyo nkinrowa ophimmwa vootthariha ekereja, masi vootthariha Masu a Muluku kintthun'aka wira kiphimmwe.

50 Masi Dalila, nyuwo mooweha? Owo aahisuwela wira Sansoni aahikhalana owerya. Nave owo khaasuwela vatthu vaakhal'aya owerya iwe. Owo khaawerya ohimya owerya waari exeni, masi waahikhala owerya wuulupale Sansoni waarin'awe, nto owo aaphavela ophwanya yoowo. Nto, ntoko Dalila, owo aahikhala eereryaka omukupaliha Sansoni ottharelela oreera wawe. Oh, owo vekeekhai aaniiwariha v'ekhapa-vo. Ni aaneetta ohoolo wawe ni aanimutheiha vakhani ntoko axiruusi oolelo, ni—ni siiso, ni nyuwo mwaairaka ntoko etthu ekina, namwiirula ikuwo, athhunaka omuvura murima Sansoni wa yoowo.

51 Eyo etthu emosaru olumwenku oniih'aya ekereja. Vano ori vai Owerya wanyu wuulupale?

52 “Ahe, hiyo naitthokiharu, eyo enoomaliha Owerya.” Ekereja Katolika ehiira eyo.

53 “Masi aFilisti anoorwa wa nyuwo, Sansoni.” Vano Lutero khikhuma-wo.

54 Vano awo khwiitthokiha-tho. “Nyuwo mwakitthukaru ni mukhoyi mukina, owo onookivarelela.” Awo khwira siiso.

55 “Nto aFilisti anoorwa wa nyuwo, Sansoni.” Exeni yiiranan'ye? Wesley khikhuma khikwasa mikhoyi.

56 “Vano nyuwo mookoototha okathi wothene. Khamunsuwela wira miyo kinnoophentani, Sansoni? Vaareera, mukileele ekeekhai mmurimani mwanyu.”

“Vaareera, mukitthuke ni mukhoyi mukina.”

57 “Vaareera, vano hiyo nnimwiira yeeyo.” Exeni iyo? Owo mukhoyi wa muromolelo.

58 “Mukihye kitaphuwe, okhala wira miyo nkirina hata muromolelo. Nto, miyo kinimoolelani, nyuwo munookooceiha.” Siiso khikhumela ota aPentekosite. Owerya wanyu ori vai?

“aFilisti anoorwa wa nyuwo.” Vano owo khikwasa-tho mikhoyi.

59 Masi vano exeni yiiranan'ye? Eyo ehaavara aPentekosite, maTotori aalupale a Divindad wa mapastore aya, mutthu mmosa muulupale. Awo arina paahi exikola yinci-ene ni maira ntoko aMetotista wala aPatista, wala akina a yawo sirin'aya. Muvolowe mukereja nave khamunimwiiwa “amen,” ooriirya paahi ntoko nikhuru na Eskimo nnimala okhuma epantte Onkela Epheyo. Ooriirya! Oohicaliwa! “Nto vano aFilisti anoorwa wa nyuwo, Sansoni.”

60 aFilisti ari wa nyuwo, Amerika. Ori vai wiiwanana iwe wa eroho? Ori vai wiiwanana wa Pentekosite? Asempeleya de Deus, ni Yoowiiwanana, ni ekereja ya Muluku, ni *ela*, *ele*, *ekina*, ni khula emosa ni ismo yoovirikana, *ela n'ile*, ni *ela n'ile*. Hiyo nri ookawanyeya mpakha onrow'anyu epoma emosa okhalaha muhakalaliho, yakhala ekereja emosa enikhaliherya ni

musurukhu, akina aya hata khanrwa. Makomunista anoorwa wa nyuwo, Amerika.

61 Owerya wahu ori vai? Ovuwa wahu ori vai? Exeni iyo? Okhala wira hiyo nrootthara ankhili a mutthu ohiya Owerya wa Muluku! Vano, awo aakhalana alaleyi ahu ni itthu sinikhala sookhaleleya ni soolipa, mpakha vanitthokihaly'aya mpakha sikhany'ahu oolipa ni oowuuma exiko, mpakha atthu. . . Nyuwo munniiwa okhuwela-tho mukereja? Khamunimwiiwa hata mutthu mukereja axonttelaka. Ikhukulu s'atthu anikhuwela sipwehiwe vathi. Khokhanle-tho ovuwa mukereja. Sothene siniir'ahu okilaathi paahi ottuli ookhalela siniwery'ahu okhala. Hiyo khanihiyo ootaphuwa. Hiyo nri ootthukiwa. Xetwani, n'axetwani awe a naanaano, arootthukasa ekereja ya Muluku mukumi. Eyo ekeekhaii. Khokhanle-tho Owerya mukereja. Khokhanle-tho otaphuwa. Atthu ari oolipa ni ookhaleleya! Vano, Muluku onniwerya orwa eriyari y'atthu aPentekosite, ni wooniherya wira Owo Mulukuu, ni wooniherya ithoonyeryo sa ohihimuwa Wawe, eyo khenaattikinya hata vakhani. Ovuwa! Vano, iwo otakaliwa! Miyo kinneetta kiviraka mulaponi, Muluku avaraka muteko, apakaka ithoonyeryo, vano atthu anookilaathi, ni, "Ahe, miyo kinoona wira ele etthu yooreera. Oh, miyo koosuwela wira enniweryaneya wiiriwa." Eyo khenaattikinya! Mwaha wa xeni? Awo arootthukiwa ni Dalila, olumwenku. Awo ari mmakwicilini.

62 Vano awo arimwaakeliha-mo, waatthuka muhina wa mwaataano. "aFilisti ari wa nyuwo, Sansoni." Munrowa wira exeni mwaha wa yeeyo?

63 "Oh, hiyo nihaana miromolelo suulupale." Vekeekhai. "Hiyo nihaana atthu anci-ene sihitonko ahu okhalana." Masi Eroho ene eri vai? Eri vai Eroho Yowarya?

64 Ti yeeyo xetwani iiraly'awe. Orookela mukereja. Owo orootthikela atthunaka okela mukereja, "Murwe wa miyo, kinimoovahani etapernakulu yuulupale nno nyuwo mwiiraru *ila* paahi. Nyuwo mwamukumiharu mulaleyi ule oothipelela orin'anyu, mmukuxa mutthu, Totori a Divindad orina muupuwelo, hiyo nnooteka ekereja yuulupale ya khalai ni nnookhala ntoko akina aya." Wuuliha muru! Fatari okhalana mutthu ahaarowa osuwela nusu n'enuku y'ekafe ni ekhutte, masi akhanleene oosareya Eroho Yowarya, akhanleene ohiisakaleliha, mwa Owerya wa Muluku.

65 Masi eyo enikhala, oh, yoolipa, mpakha santu mmosa namuhaawi onikhum'awe eriyari ya muthukumano n'ulavula ilavulelo, wala okhuwela vakhani, wala wira etthu, nto akina aya othene anooweha n'uxanka. "Exeni ile? Ahe, kinimwiikoha mwaha wa xeni? Ohaana okhala namathipelela orwiiye akhumaka nipuro nno." Nyuwo moosuwela wira eyo ekeekhaii! Santu mmosa namuhaawi onookela, n'ukhala

ootteeliwa murima voophiyerya ovenxa matata awe, ni wunla ni waattotopela Apwiya, mutthu onrowa okhuwela “amen” mwaha w'olaleiwa Ehapari yooreera, nto akina aya anoorukunuwa ni wona etthu owo ohimmy'awe. Awo t'aPentekosite. Mulattu aya xeni? Nyuwo munaatakiha aMetotista, aPatista; awo yaatakinhe aKatolika; aKatolika atakihenrye omooroni. Nto, othene aya vamosa, yothene eyo ntoko omooroni! Ekeekhai.

<sup>66</sup> Dalila onthuna wookelihani ikereja suulupale, sooreera, arumeyi oolakeya, okhalana muloko wooratta. “Ahe, moosuwela, *Lexe ni lexe* ohitto nno namusurukhu munciene, naawenrye omuruuha mmuthukumanoni mwahu! Oh, wulu!” Owo aahiyariwe vasya, weso khamphwanela okhala mmo. Khenikicala aarineene itoolare imilyau sene. Aarineene aCadillac miloko mixexe, etthu p'itthu orin'awe, owo ohaana oyariwa vasya, orwa naanaanoru oyariwa vasya ni oyariwa wa nenli ni Eroho Yowarya, okhuma vale ayariweene vasya, ni akhumaka kamas (kileveleliwe), anlaka ni akhuwelaka, ni airaka siiso ntoko akina siniir'aya, ni ohoolo waya okhalana makhalelo anooniherya wira owo ookhalana Eyo. Amen. Ti yeeyo entthuneya wa nyuwo.

<sup>67</sup> “Sansoni, aFilisti anoorwa wa nyuwo.” maKomunista aanoorwa wa nyuwo. Olumwenku onoorwa wa nyuwo. Xetwani onoorwa wa nyuwo.

<sup>68</sup> Awo anoothika ni wona Eroho ya Muluku opaka miiriirya ni wira itthu sinooniherya ohihimuwa Wawe, yeeyo Yesu aahimme awe, awo aniira, “Moosuwela, miyo kinoona wira Munna Branham ookhalana etelepata yinci-ene mmuruni. Pastore aka ohimnye wira yaari ya xetwani.”

<sup>69</sup> Nyuwo namuhaawi, namirima miili, oohaamini oowootothiwa, sothene sooratta, nyuwo mwiiici muhina w'ekuwo ya epwittipwitthi! Yesu ohimnye wira, “Mwaakisuwenle Miyo, mwaamusuwela nihiku Naka.” Masi nyuwo murina nikhuru na maSawuli antthuna wookhalihani ntoko atthu akina a molumwenkuni.

<sup>70</sup> Hiyo nintthuna nikhuru n'atthu a Muluku ahiniisakaleliha mwa Masu, masi anlaleya Ekeekhai ni ankhala v'opatiiso wa Eroho Yowarya.

<sup>71</sup> Masi olumwenku wiirale exeni? Owo oroomettha Owerya wanyu wothene. Nyuwo muyariwe muNasiri, muPentekosite, masi olumwenku vekeekhai woomettha Owerya wanyu. Vano ti yoolipa ntoko akina a yawo.

<sup>72</sup> Ninrowa wira exeni? Exeni enrowa wiiraneya? Yookhala etthu yoovuwa enwery'aka wuupuwela wira kimalihe yoosoma ela.

<sup>73</sup> Okathi Sansoni aary'awe ootthukiwa! Hiyo khaninwerya okhalana muhakalaliho. Mmwiiwe munn'ihu oororomeleya,

Billy Graham, “Muhakalaliho wa nihiku nahu!” Mmwiiwe Oral Roberts okhuwela, “Muhakalaliho wa nihiku nahu!” Nwiiwe akina aya, “Muhakalaliho wa nihiku nahu!” Nniwerya sai hiyo okhalana muhakalaliho nitthukiweene? Hiyo nrootthuka Eroho Yowarya, ni mitthenkeso sahu ni ilimalelo, ni khaninwerya okhalana muhakalaliho wa Eroho Yowarya. Amen. Miyo koosuwela wira eyo enoopaha vooviha-vo, n’ukathi, masi eyo Ekeekhaii. Ninwerya sai okhalana muhakalaliho wa Eroho Yowarya muryeene ootthukiwa ni oolipa! “Owooneya ntoko oothunku,” Bibilia ohimmye wira awo yaamukhalana. “Wooneya ntoko oothunku, masi yaamukhootta Owerya waya nave.” Owerya wa xeni? Owerya wa mutthenkeso? Owerya wa molumwenkuni? Owerya wa ekereja? Owerya wa Eroho Yowarya! Nlo ti nipuro na esiiri mukereja. Nto ekereja yaakhalanaka alaleyi oosoma, ni ipa suulupale ni ereeriho, ohiya Eroho Yowarya mwa enamuna ya khalai, yaamurerela athu okhala mmutekoni tho. Amen. Ekeekhai. Munrowa okhalana sai muhakalaliho wa Eroho Yowarya, n’athu attipihaka Yeeyo ni atthukaka Yeeyo ni yoovaka Yeeyo? Ti vaavo mulattu omphwanyaney’aya-vo.

<sup>74</sup> “aFilisti anoorwa wa nyuwo.” Masi nrromelo wooreerihwa hiyo orin’ahu, okathi Sansoni waary’awe mukhatteya. . .

<sup>75</sup> Etthu xeni yoopacerya awo yiiranse aya okathi amuvanre aya? Awo yaaroomutthuka, toko. Awo yaakhuminhe owerya wawe, awo yaarophwanya esiiri awe. Awo aaphwanya esiiri anyu. Olumwenku woophwanya esiiri anyu. Vano nyuwo athiyana othene munimettha maihi anyu, eyo enrowa ntoko olumwenku. Nyuwo alopwana othene munoorowa ni wira ntoko olumwenku. Eri sana, olavula iperwa ni iperwa soonanara, n’ukhuma ni waalya asikaro vakhani, ni weetta n’awar’aya a namaitthoko anyu, ni itthu sothene ntoko seiyo, yoowurya yaamukhaani yoohapala y’opatthani wira mulipiherye muteko anyu. Miyo kaamuthanla orupaathela erukulu aka n’ukhura ipulaxa sa maasi ni makha n’uwurya maasi a mmuro, kikhanleene ooloka ni ooreera murima ohoolo wa Muluku, ohikhanle wiisakaleliha ni enamuna t’inamuna ya muteko. Eyo ekeekhaii. Ekeekhai. Mukhale ooromeleya wa Muluku.

<sup>76</sup> “Sansoni, aFilisti ari wa nyuwo.” Tapernakulu Branham, ismo ya mulaponi enoopuruleya eriyari anyu. Anghi ila? Murimuupulula esiiri anyu? Murimuupulula esiiri ile Muluku oovanh’aweni okathi waaphirikeyakanyu vatthuparini iyakha vakhani sivinre? Muroohiya eyo opuruleya n’ukokhorela w’epatthani, ni wookhaleleya? Exeni ewinreni? Muluku onniwerya okhuruwa n’upaka mwiirirya n’urowa naanaanoru vamuthukumanoni ni waahimeerya atthu isiiri sa mmurimani mwaya, ni itthu sothene, ni waavoniha aretta ni ooxanka, ni wira ithoonyeryo ni mitikiniho, n’ulaleya Masu Awe volipavo ntoko awo sinwery’aya, ni Eroho Yowarya; nto atthu aniira,



“Ahe, miyo kinoona wira eyo eri sana. Hiyo vanninisivela wiiwa imara kamosa kamosa, naahikhaleru oowooceyaxa.” Eyo ti Tapernakulu Branham. aFilisti ari wa nyuwo.

<sup>77</sup> Okathi, wiiraneyak'aya olaleiwa wa Masu, ni masantu a khalai ni maithori mmaithoni mwaya, yaamuvenya ni weetta, ni naatekhume, khino ahilavulaka hata nuulumo, yeettasaka paahi, imara piili wala tthaaru, n'ukilaathi, oosareya sana Eroho Yowarya! Masu yaanaalyiha! “Mutthu khankhala mukumi ni yolya paahi, masi ni Masu othene anikhuma mwano mwa Muluku.” aFilisti ari wa nyuwo, Tapernakulu Branham.

aFilisti ari wa nyuwo, aPentekosite.

<sup>78</sup> Vekeekhai, aFilisti ahoovarani, nyuwo othene akina, khalai okathi wiitthokinhe anyu sana, khiyaavo yaaweryaneya okela 'muhikhanle Prespiteriyano, muPatista, Metotista, muKatolika, wala ethu siiso. Nyuwo khamwaarina nata n'akina a yawo.

<sup>79</sup> Vano, muhakalaliho nihiku nahu? Nniwerya sai hiyo okhalana yowo mulipa-oovaha muhakalaliho a khula nihiku otthukiweene n'ulumwenku? Muluku khanrwa vatthu olumwenku vary'aya, nyuwo mulipeke ni yeeyo paahi. Nyuwo muniitakaiha n'ulumwenku, vano ti—ti yeeyo tu. Mwaahiyaka olumwenku opuruleya okelaka muhina, nyuwo munimwiira ntoko olumwenku, vano nyuwo moomalamala. Masi nyuwo mwakwasaru makwicili othene a molumwenkuni, khirwa wa Muluku, Muluku nimoovarelandi muteko mpakha nyuwo orowa opatthana tho.

<sup>80</sup> Va t'uri muroromelo mmosa paahi orin'aka voosiis'ula, wira kimalihe Mutthaka aka, t'ula, “Okathi Sansoni aary'awe ootthukiwa, mukopwe mukina wa maihi waahimelela.”

<sup>81</sup> Muluku aniveleelihe Ekereja ekina okathi vakhani okathi ohinatthi omala, yeeyo Owerya wa Eroho Yowarya onwery'aya okela-mo, ni wooniherya wa Eroho, ni enweryaney'aya Marko 16 otthara Ekereja, Miteko 2:4, Miteko 2:38, yothene ela vekeekhai enookela ohoolo ni Ekereja. Ithoonyeryo ni mitikiniho sinnaahoola arummwa. Ithoonyeryo suulupale sa ohihimuwa Wawe sinnaahoola yawo. Okathi hiyo ory'ahu ootthukeliwa, vekeekhai Muluku onookumiherya ohepa nipuro nlo, wa wiiva wuulupale wookiserya. Mukhale nyuwo, mpatthani aka muKristu va voosiis'ula, sikhale ikuru sanyu simpacerya wunnuwa. Miyo kinvekela wira Mutthaka ola voosiis'ula, ni elapo onrow'aya, kinroromela wira Mutthaka ola onookhaliherya oruua evitamina mmukhaleloni mwanyu wira wunnuwe-mo Owerya wa eroho onthhikela tho mw'ekumini mwanyu.

Nuuramihe miru sahu nivekele.

<sup>82</sup> O Pwiya Muluku, Mpattuxa a Wirimu ni vathi, Mwaneene Ekumi Ehinimala, ni Nanvaha a yoovaha yooreera ni ya eroho, mukuxe moolumo ala voosiis'ula muhele mmurimani, ni

munaanihe, Pwiya. Wira atthu avekele itthu iya, yoonaka wira olumwenku oheepesa ekereja ni woomala ophwanya Owerya waya, woophwanya nipuro naya na esiiri, woophwanya vatthu vari esiiri aya, ni woomettha eyo. Ohaakuxa atthu yaatonko okhuwela mwaha w'oxintta, yaatonko oxintta, ni ohaamettha, wira ekhaleke owani Namararu ohiyu wira yooneke eprokrama ya mutelevisauni. Wookumiha ohakalala mmurimani mwaya, khwaavaha ophentexa olumwenku ovikana sirin'aya ni Muluku. Ohaavahaxa sa molumwenkuni, sa molumwenkuni, otthunexa orukuneya wa molumwenkuni ovikana elaleeriwo ya Ehapari yooreera. Waahikhale muloko muulupale w'alipa-oowiipa ni wuukhuwa wunci-ene, ni onyakula ni wuukhuwa, weso awo khandthuna Ehapari yooreera ya khalai, tho, yeeyo eniruuha maithori a ohakalala mmunepani, yeeyo enihokoloxa ovoniha wa Muluku, enuuluula soovaha sa arummwa mukereja, yeeyo enaaruuha mwa Kristu oohihimuwa, Mesiya a nihiku nla.

<sup>83</sup> Masi ntoko Isarayeli aatthukiw'awe ni—ni mamwene awe, okhala wira awo khayaawerya omutthara Mwene eekeekhai; nto Mwene eekeekhai, okathi Owo oruuly'awe, awo khayaamusuwenle Owo. Ti siiso olelo. O Pwiya, Mwene a Ovuwa ohoorwa mwa mukhalelo wa Eroho Yowarya, nto, Pwiya, awo khansuwela. Awo ahithhokiha voolipa, mpakha sihiniw'aya sana, okhala wira eyo khekhanle mmutthenkesoni mwaya. Pwiya, ola muteko wa xetwani oniiwiirihya eyo atthu.

<sup>84</sup> Sansoni a Muluku, wira ekeekhai mmurimani, ale anwehererya ni anikhuwela, ni avekelaka ni yiilipihaka, ekhale ni yeeyo, Pwiya, mpakha maihi ala wunnuwa tho, mpakha orwe-tho ohakalala oSiyoni, ni nrwe nikhuru ninwerya osuwela ni wiiwa sana, ninwerya omoona Mesiya ni Owerya wowiipitha wiipithiheriwe olumwenku, wira awo ehiiwe sana vano. Munivahe, Pwiya, wira awo yoone ela. Vano hiyo ninvekela mwa Nsina na Yesu. Amen.

[Nipuro vahiitthu mufiitani—Mol.]

. . . Owerya naanaano va,  
O Pwiya, nveleelihe Owerya naanaano va  
Nto mmupatise khula mmosa.

Awo yaarisa empa y'osulu,  
Awo yaari ni murima mmosa,  
Okathi Eroho Yowarya ekhurunwe aya  
Yeeyo yaalaiheriwe ni Pwiya ahu.

O Pwiya, nveleelihe Owerya Wanyu naanaano  
va,  
O Pwiya, nveleelihe Owerya Wanyu naanaano  
va;

O Pwiya, nveleelihe Owerya Wanyu naanaano  
va  
Nto mmupatise khula mmosa.

<sup>85</sup> Moota onimphent'aka Yowo! Nveleelihe Owerya Wawe paahi! Awo yaarisa empa y'osulu, othene ni murima mmosa. Olumwenku wothene waahuuma mwa yawo. Awo yaari oohikhalan'etthu, nto Eroho Yowarya khirwa.

<sup>86</sup> Olelo atthu aniira, "Murwe, mwiitakaihe mukereja, muhele nsina nanyu muliivuruni. Wala muurame mwiire, 'Miyo kinnimwaamini Kristu ntoko Mwana a Muluku,' nvenye." Xetwani oniira etthu emosaru. Vekeekhai. Xetwani aahipatisiwa okathi Yuta waapatisiw'awe. Xetwani aahikhuma khulaleya Ehapari yooreera okathi Yuta aaronwe awe olaleya Ehapari yooreera. Masi xetwani khaakhenle Eroho Yowarya. Ti yeeyo. Ti vaavo vari Owerya wowiipitha, ohihimuwa iwe, osuwela iwe wekeekhai, woohikhala hata ohoverya. Amen.

<sup>87</sup> Owo ori vaava. Eroho Yowarya emosaru yeele, Yeele yaari mwa Mesiya, nlelo Mukereja Mwawe. Owo khanihiya. "Miyo kinookhala ni nyuwo okathi wothene, hata mwa nyuwo, mpakha woomaleloni w'olumwenku. Miyo kinookhala vo. Miteko Miyo sinvar'aka, nyuwo munoovara nave. Soovikana iya nyuwo munoovara, maana Miyo kinrowa w'Atithi Aka."

<sup>88</sup> Masi olumwenku onoosakaleliha, "Oh, awo mahikuu avinre!" Vekeekhai yeeyo xetwani onttun'awe wira nyuwo mwiire. Awo antthuna wira nyuwo mweeperyeke. Muluku onttthuna wira nyuwo mupatisiwe. Muluku onttthuna wira nyuwo...Nyuwo muniira, "Oh, miyo nkinaamini evitika-vitika ele yothene iwe." Muroweke ohoolo ni mukhaleke, muroweke ohoolo ni mukhaleke mutampini mwanyu, mukhaleke mutampini mwanyu. Masi mpakha nyuwo wuntta, mpakha nyuwo wuntta ni ankhili anyu, mpakha nyuwo wuntta ni mihapo sanyu, khuyariwa vanenli n'uyariwa vasya, nto Ekumi ile esya enookhala yoovirikana voomalela n'ile eronwe vathi.

<sup>89</sup> Enuku ya nakhuwo enrowa vathi erylene ya ncano, enikhuma ekithi. Enrowa vathi yoolipa, yookela muhina, enikhuma yooveyaveya ni eveveyaka n'ittheke. Oh, owuwa! Aleluya! Ittheke sapacerya oruma, enuku khenwerya wira hat'etthu woohikhala wiittikinya, weetta, masi nikukhu—nikukhu naamukhaani nnimuurama n'utthapa, nto nnimunnuwa, ni wiilipiherya. Khaninwerya okhala nikukhu mpakha nakhuwo owo okhwa ni wuntta. Kahi okhwa paahi; masi wuntta. Khanwerya-tho otthika, masi ekumi enookhuma memmo.

<sup>90</sup> Ntoko sihimaly'aka okathi vakhani ovinre, oyariwa etthu yoonanara, ya nikhurumela, yoottakatta, yoomalela ottakatta, masi ti vaavo ekumi vanikhal'aya. Nyuwo mwiisoonaaru mmansinyu ottakatta, wona iyaminelo sanyu sa eMetotista,

Patista ni ePentekosite ottakatta, ni okhwa waltari, vano Ekumi esya enookela. Eroho Yowarya enimookhalihani ovikana eyo; nyuwo munoomoona Muluku.

<sup>91</sup> Hiyo nnoomoona Owo nihiku nlo noovuwa. Nihiku nlo ovikana vaniphiiy'aya wona w'okhwa, hiyo nnoomoona Owo. Nyuwo munnaamini yeeyo? Nihiku nlo ovikana vaniphiiy'aya wona w'okhwa, iwe onnikiwehererya omeelo w'otthapa.

<sup>92</sup> Miyo keemenle osulu nno vakompa nsana ohiyu, nto kuupuwela wira kaaroomoona Rabbi Lawson mwaamukhaani. Okathi waakhalak'awe va, ni onamookola ttootto awe a khalai n'ukipurula n'exiko awe, muxikoni mwaka ni ttootto awe, vasulu va mpakha vapulpitu, ni wiipa nsipo nle, "Iwe ennikiwehererya miyo e . . ." [Nipuro vahiiitthu mufiitani—Mol.] . . . ? . . .

<sup>93</sup> Yookhala etthu yaakhumelenle! Eyo yaahikumiherya olumwenku ota. Kipacerya wona itthu ovirikana. Miyo kinnixanka vanci-ene mwaha wa enamuna atthu ala a wAmerika siniir'aya, voohihiyererya, mwakha ti mwakha, owona athiyana n'alopwana moota aniihonon'aya akelaka mutampini, mpakha vaahalel'aka ohileya, imara piili wala tthaaru, kixankaka mwaha wa yeeyo. Nsana, miyo khimwiirela Muluku, "Miyo nkinxaka-tho. Masu Anyu ahimmye wira yaarowa okhala siiso. Masi miyo kinimweemela v'ephakani kipwapwele, ni sothene siri mwa miyo."

<sup>94</sup> Nihiku nlo, keemenleene osulu iwe oNxiloni w'oGreen, muttupha aka, ottaiwene mothakoni, kivekelaka nihiku nothene. Okathi woophiyaka ewora yaneeraru, nsuwa naamutupweela, ni miyo keemenle osulu iwe kiwehaweheka, kikhuma mmuttuphani, kiwela vamwala muulupale. Nto miyo keemenle vale, kiwehaka Onikhuma nsuwa, kaattottopelaka Apwiya. Nto kaaniwerya wona nsuwa nikhuruwaka wiithela wa miri vasulu vamwako, okathi waaweh'aka ekhato muhina wa sikina, ni makukhu oowaatta vasulu, voomaleleya paahi saaweryaney'aya okhala. Nto miyo khwira, "Pwiya, nihiku nlo Nyuwo mwahimuvitha Moise v'ephakani va mwala, nto Nyuwo mwaahivira vakhiviru va yowo, okhala wira owo aahooceya. Masi Nyuwo mwaahivira vakhiviru, ni owo iirale wira 'yaakhala ntoko muthana wa mutthu.'" Miyo khwira, "Mukivithe mphakani, Pwiya." Okathi ene yoowo, epante aka emosa, khurwa Ettheke yaamukhaani yiittikinyaka mmirini. Eyo khuttikinyeya erowaka, erwaaka epante kaary'aka, Ettheke yaamukhaani yiittikinyaka, khurowa mutakhwani. Miyo kikhala vaavale.

Nihiku nlo, Muluku paahi t'onsuwela vai wala  
silini,  
Mattheke othene eekumi enookhwa  
anoomaala,  
Nto miyo kinoorowa okhala omwako Siyoni.

Nihiku nlo ovikana vaniphiy'aya wona  
w'okhwa,  
Nihiku nlo, Muluku paahi t'onsuwela vai wala  
silini,  
(Exeni enrowa okhumelela? Enrowa omaala,  
mattheke ala othene makhani anvilikeya.)  
Mattheke othene eekumi enookhwa  
anoomaala,  
Nto hiyo nnoorowa okhala omwako Siyoni.

Mukhuruwe, ekaaro yoosivela,  
Murwaaka okikuxa okiroiha Owani;  
Mukhuruwe, ekaaro yoosivela,  
Murwaaka okikuxa okiroiha Owani.

Mwaphiya vale miyo kihinatthi ophiya,  
Murwaaka okikuxa okiroiha Owani;  
Mmuleele Munna Bosworth, ni axipatthani aka  
othene, nave,  
Murwaaka paahi okikuxa okiroiha Owani.

Vano mukhuruwe... (Eyo enookhuruwa  
naanaanoru nihiku nlo nto enookiroiha  
osulu)... eka-...

(Khula mwiri onoovarela mooro; Malaikha a  
Muluku, ekaaro ya mooro)... wira ekikuxe  
ekiroihe Owani;  
Mukhuruwe, ekaaro yoosivela,  
Murwaaka okikuxa okiroiha Owani.

<sup>95</sup> Nihiku nlo nimosa, nihiku nlo nimosa mapuro ootepaxa  
okhala vathi a okathi w'okhwa waka, miyo kinoomuweha Owo  
arwaaka. Eyo ekeekhaii.

Miyo kaahiweha epantte ekina ya Yordani ni  
etthu koonaly'aka  
Erwaaka okikuxa okiroiha Owani; (ntoko  
Eliya mutokweene awehaka epantte ekina ya  
Yordani)  
Muloko wa Malaikha oowarya arwaaka  
okiphavela,  
Awo jaarweela okikuxa okiroiha Owani.

Mukhuruwe, mukhuruwe sana, ekaaro  
yoosivela,  
Murwaaka okikuxa okiroiha Owani;  
Mukhuruwe, ekaaro yoosivela,  
Murwaaka okikuxa okiroiha Owani.

<sup>96</sup> Apwiya Yesu, Mulipa-ooweettiha ooreerihiwa a ekaaro  
yeela, Nahota a ekalawa ela ya khalai ya oSiyoni, ekalawa  
y'Ekumi, yeettaka mpaani, elavulaka, Mukhalelo Awe ori vaava.  
Eroho Yowarya yeele emuhihimunxe Yowo mmahiye eri vaava.

97 Okhala wira khasikaiwe ittikitti sa mavekelo, ookhala mutthu va onikhuma ota wa muttethe, ohimmusuwel'aka, ori vaava wira avekeleliwe? Nvenxe matata anyu, miyo nkinsuwela. Nvenxerye matata anyu osulu, miyo nkinsuwela. Nyuwo, nyuwo vo. Miyo kookupali wira ti mutthu ule mwaamukhaani orina ipwetupwetu ottuli iwe, ookhala ovenxale ntata epantte ele. Ayo, nyuwo, moovenxa ntata? Vaareera. Ottuli iwo, nyuwo, mulopwana. Vaareera. Nyuwo othene mwa amalapo wa miyo? Pwiya Yesu yoole, Makhampusi mmosaru a nikoto nla va, nyuwo munaamini wira a natiri Awe t'ekeekhai? Owo onnireeriha ekereja Awe, ni "Miteko Miyo sinvar'aka, nyuwo munoovara, nave. Hata suulupale ovikana iya nyuwo munoovara, maana Miyo kinrowa w'Atithi Aka. Soovikana iya!" Nyuwo munnaamini yeeyo?

98 Nyuwo moovenxa ntata nanyu wira khamwaakisuwela? Nyuwo munnaamini wira Muluku onniwerya okileela eri mmurimani mwanyu, onniwerya olavula ni miyo siiso ntoko Owo siiraly'awe ni muthiyana aakwanniyale nlaya Nawe? Nyuwo munnaamini wira Owo ti Namukuttho Muulupale onwerya okwanyiwa ni ewereyelo sa iretta sahu? Muluku akuupululelaru mukhalelo anyu, munimwaamini wira miyo ka profeta Awe, munimwaamini wira Mukhalelo Awe ori vaava ni wira tivo Owo onthunihery'awe eyo? Nyuwo munaavekelela amwaar'inyu. Awo arimunteya eyuunu, eyuunu erookhumuwa. Eyo ekeekhaii. Yaari ekeekhai, nvenye. Vaareera, murowe mwaaphwanye, akumi. Amen.

99 Ankhi nyuwo ottuli iwo, mutthu mwaamukhaani uwo ovennye, yoole aarina ipwetupwetu? Nyuwo munnaamini ni murima anyu wothene? Nyuwo munnaamini wira Muluku aamuwerya okileela mixankiho sanyu? Munnaamini wira mwan'inyu onookhala sana? Munaamini? Mookhalana mwammiravo, owo oroosupiya. Eyo ekeekhaii. Nyuwo khamuhiyo...t'oKentucky. Eyo yaari ekeekhai, nvenxe ntata nanyu. Miyo nkinoosuwelani, kinnoosuwelani? Koosuwelakani...Nvenxe matata anyu so, hiyo khaninsuwelana mmosa ni mukhw'awe. Eyo ekeekhai. Nimuroromelaka Muluku. Nyuwo munnaamini? Ntoko sinaamini anyu, mmuphwanye mwammiravo anyu enamuna siinaamini anyu. Muhele vamurimani vanyu paahi.

100 T'ani aari va ovenxale matata awe, yowo miyo kiha—kiha... Mwaari nyuwo? Vaareera, mwenye, nyuwo munnaamini wira miyo ka profeta a Muluku? [Mulopwan'owo oniira, "Amen."—Mol.] Munnaamini, ni murima anyu wothene? Khamurina yo weemela, mukhale vaavo paahi. Vaareera, mulopwana, mulattu anyu xeni, nyuwo murina tiyapeeti. ["Eyo ekeekhaii."] Nto owo onoohaaxa n nawo nanyu. ["Ayo."] Nyuwo munikhuma Ohio. ["Ayo."] Nsina nanyu ti Mwenye Miller. ["Eyo ekeekhaii."]

Mutthikele owani mukhale mukumi. Vaareera, mwaamini ni murima anyu wothene. Vaareera.

Nyuwo munaamini ni...Mwaamini. Mwaaweryaka wamini!

<sup>101</sup> Muhano okilanthi va, moovenxa ntata nanyu? Muhano muulupale, owanre ilumeta, munnaamini ni murima anyu wothene? Munnaamini ni...Munnaamini wira ka murumeyi a Muluku? Munnaamini? Vaareera, Muluku awerya okileela muxankiho anyu, nyuwo munimwaamini? Muxankiho wa murima. Vaareera, nvenxe ntata nanyu yaaryeene ekeekhai. Vaareera.

<sup>102</sup> Muhano owo va vakhiviru ni nyuwo, ovennye. Murima; masi vekeekhai maitho anyu. Miyo kinnimusuwela. Vaareera, mwaaweryaka wamini!

<sup>103</sup> Ottuli iwo, mulopwana owo onttharelana ottuli iwo orina muxankiho wa murima, nave, ni eretta vasapalani. Munnaamini wira Muluku onimookhalihani sana? Munnaamini, mulopwana?

<sup>104</sup> Okhala mulopwana mmosa ottuli iwo nipuro nlo, ovenxale matat'awe aha...Mwenye Schubert. Vaareera, mulopwana. Vaareera, munnaamini? Mwaha wa maitho anyu, nave, kehiyo? Nyuwo munaavekelela amey'anyu akilanthi vo, nave. Yaari ekeekhai, nvenxe ntata nanyu. Hiyo khaninsuwelana. Eyo ekeekhai? Muvahane mukhono, muvahane mukhono mmosa ni mukhw'awe. Vaareera, ti yeeyo. Mwaaweryaka wamini, munimwaakhela!

<sup>105</sup> Yesu Kristu ohihimunwe ori mpaani mu. Owo mmosaru Yoole. Eyo eniwiirelani exeni? Nyuwo muroohiya olumwenku okumiha ikuru sanyu sothene mwa nyuwo? Ovuwa! Miyo kintthuna oyariwa vasya! Miyo kintthuna Ekumi esya! Khenikicala moota xeni Eyo enirw'aya, vakhala wira kihaana okhala santu oophirikeya, etthu p'itthu. Khenikicala moota xeni Eyo enirw'aya, miyo kintthuna Eroho Yowarya yekeekhai yeeyo eri mwa miyo naanaano va. Miyo kintthuna kisuke Eyo! Miyo kinnithanla okhalana Yeeyo ovikana itthu sothene sa molumwenkuni. Amen! Nyuwo munnaamini? Nyuwo munnaamini wira Owo ori vaava?

<sup>106</sup> Mwiixatheryane matata mmosa ni mukhw'awe, nto. Mukileele etthu emosa ekina Owo aarow'awe owerya wira. Hat'etthu. Mwaamini vano. Mwaamini wira yoomala.

<sup>107</sup> Pwiya Muluku, Mpattuxa a Wirimu ni vathi, Mwaneene Ekumi Ehinimala, ni Nanvaha a soovaha sothene sooreera, Eroho Anyu eri vaava ereerihaka vanci-ene, Pwiya, enikhala ntoko emp'ela enoomumula, erowaka nno ni nno. Atthu ahinweryelani wiiwa sana eyo, Pwiya? Awo ari—awo arimwiitakaniha vanci-ene n'ulumwenku, khukhala ooriirya ni ookhalela ni oolipa, mpakha sihinwery'aya tho woosuwelani Nyuwo? Pwiya Muluku, Owerya nno waamane atthu othene, ni

khula mutthu onwereiwa avonihwiwe, khula natampi oopowe, nto Muluku aphwanye ovuwa. Mwa Yesu Kristu, Mwana a Muluku, miyo kinnivekela. Amen.

108 Nyuwo munnaamini? Nvenxe matata anyu. Munnaakhela ovona wanyu? Muluku ooreeriheni. Vano murowe mwaphwanye siiso ntoko sinaamini anyu, enookhala siiso. Miyo kinnoona soowoona sikhumelelaka imosa vasulu va sikina. Eyo ekeekhaii. Miyo kihaana otthika ohiy'ula.

109 Nyuwo mwaahaamini-ru vano, khamunrowa okhalakhala mwaaminiki. Eyo ekeekhaii. Yesu aahira eyo emara emosa, nto awo khwira, "Nyuwo mwa . . . Hiyo noosuwela wira Mesiya arwa vale, Owo onoonileela ela." Owo iirale, "Miyo koosuwela wira Mesiya onimwiira yeeyo. Masi Nyuwo Mw'ani?"

Owo khwira, "Miyo ka Yowo."

110 Vano owo khutthyawa arowaka opoma khwira, "Murwe, mmoone Mulopwana mmosa Yowo osuwenle wira kaari ani ni etthu kiiraly'aka. Kahi yoola Mesiya?"


111 Owo ohimnye wira, "Itthu iya sinookhumelela tho mahiku ookiserya. Ekereja enoolaleerya Ekeekhai, Eyo enookhala ni Masu. Eyo enimwiira Sooruma sothene sa Muluku. Eyo kheniitakaniha ni olumwenku. Ni vaavo miyo kinoorowa ni kinimwiira itthu imosaru."

112 Masi Owo ohimnye wira, "Atthu anookhala oothipelela, owiisoona, oosiveliwa itthu sooreera sa vathi onvikana Muluku, oohaatanihaya, oowootherya akhw'aya, akhalaka ntoko atthu oothunku," anatiini vanci-ene, arowaka okereja. "Akhalka ntoko atthu oothunku, masi ekhootaka Owerya waya nave. Awo muheettaneke!"

113 Nyuwo mwaatthu, hata wira mwaari vai mukereja, yeeyo Owo iihanne awe naanaano va, yoowoona yookikhuma. Vaari wira—vaari wira ele yaari ekeekhaii, etthu ehimaly'aka, ni miyo kihisuwelaka ele mwa nyuwo, nvenxe matata anyu, onakhaleru mutthu ti mutthu. Mukereja mothene, khula—khula mutthu. Vaareera. Munnona? Nkinaasuwela, nkinatoko owoona; masi Eroho Yowarya eri vaava ni Eyo ennaasuwela. Khamunwerya wona wira nkhiyo miyo?

114 Nwiriyan! Vakhala wira Owo onnikiroromela ni yeeyo, Owo onookiroromela ni Ekeekhai ya Masu, okhala wira Ekeekhai enoorwa ni Masu paahi. "Murukunuxe murima, khula mutthu, mupatisiwe ni Nsina na Yesu Kristu, wira muleveleliwe itampi, nto munimwaakhela yoovaha ya Eroho Yowarya, maana natiri t'awinyu nyuwo ni awaya an'inyu, n'ale ari ottaiwene, othene ale Apwiya Muluku ahu antthun'aya owiihana." Nyuwo munnaamini iyo? Onookhala muteko w'opatiiso naanaano va.



<sup>115</sup> Nuuramihe miru sahu. Kinoomuvekela pastore wira avekele okathi onthokihw'aya muteko w'opatiiso. Kinoona wira wookhala muteko w'opatiiso onaattamela. Vaareera. 

*EKEREJA YOOWOKIWA N'ULUMWENKU* EMK59-0628M

(A Deceived Church, By The World)

ETTHARANELO YA IKEREJA

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku vaasiisu, mahiku yettata 28 mweri wa Junho, 1959, oBranham Tabernacle oJeffersonville, Indiana, w'Amerika, okuxiwe wookaravariwa mufitani ya makineti khulempwa wothene ni nttaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2019 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Copyright notice

All rights reserved. This book may be printed on a home printer for personal use or to be given out, free of charge, as a tool to spread the Gospel of Jesus Christ. This book cannot be sold, reproduced on a large scale, posted on a website, stored in a retrieval system, translated into other languages, or used for soliciting funds without the express written permission of Voice Of God Recordings®.

For more information or for other available material, please contact:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)